



**Quæstionum Canonicarum, In Quinque Libros  
Decretalium, Tomus ...**

In Librum II. Decretalium, Per Triginta Titulos Distributum, In Quo Agitur  
De Judiciis, Foro Competenti, Libelli Oblatione, Mutuis petitionibus, ...

**Krimer, Ferdinand**

**Augustæ Vindelicorum, 1708**

§. Unicus. An, qui fugit judicium, præsumatur confiteri objecta?

---

[urn:nbn:de:hbz:466:1-73001](#)

191. Not. 7. neminem debere condemnari de gravi criminis propter præsumptionem etiam *vehementem*, ex c. literas 14. b. t. ubi, quantumvis esset *vehemens* præsumptio, quod Gustavus, de quo in textu, laboraret vitio hæretis, Pontifex statuit: mandamus, quatenus, cum propter *solanum suspicionem* (quamvis *vehementem*) nolumus illum de tam gravi criminis condemnari, taliter & tantam securitatem recipiatis ab ipso, præter juratoriam cautionem, quod timore poenæ corporalis debeat coerceri, discretam ei penitentiam injungentes, ex qua valeat apparere, utrum in tenebris ambulet, an in luce: utrumque sit verè penitens, an fictè conversus: & si eum hoc modo verum Catholicum cognoveritis, non finatis ipsum indebet molestari: alioquin eum tanquam hæreticum condemnatis.

192. Ex hoc videtur rectè colligi, præsumptionem *violentam*, & *vehementem*, quoad effectum probandi, de jure saltem canonico, non æquiparari; nam *vehemens* non sufficit ad condemnandum de gravi criminis; ut constat ex cit. c. literas 14. *violentia* vero sufficit ad condemnandum de adulterio, ex c. literis. 12. b. t. de quo num. 1941. Etideo, ex præsumptionibus, & argumentis neminem debere criminaliter condemnari, tradunt Antonius Gomez *Variar.* tom. 3. c. 12. num. 25. Mascalodus *de probat. conclus.* 459. num. 3. per L. *absentem*. ff. de poenis, & L. qui sententiam, ff. eod. L. *Singuli*, C. de *accusat.* Rationem hujus reddunt; quia in criminalibus ad condemnationem probationes debent esse nedum concludentes, sed luce meridiana clariores, cit. L. *absentem*, cum aliis, L. *Sciant*, C. de *probat.* canonizata in c. *Sciant cuncti*. 2. q. fin. nisi præsumptiones sint juris & de jure, in quibus, quia lex præsumit, & supra præsumptionem statuit firmum jus, illam videtur approbare, c. is, qui fidem, de sponsal. c. de illis, de sponsal. impub. Unde Gomez cit. c. 12. num. 25. & alii, volunt, quod in criminalibus Judex præsumptionem juris de jure sequi te-

neatur propterea, quod, sicut ex tali præsumptione crimen legitimè patet; sic etiam debeat patere *Judici*; Judex autem procedere debeat patente ipsi delicto. Verum, an tales præsumptiones delictum probent luce meridianâ clarissim, ac indubitate? prout exigitur L. ult. C. de *probat.* ut exinde feratur sententia capitalis, mihi valde dubium est; cum illa certitudo non detur sine fictione, ut notavimus n. 1935.

193. Not. 8. Clericum, qui impetravit rescriptum, ut recipiatur in numerum beneficiorum cum clausula, *si idoneus fuerit*, ex hoc ipso habere pro se præsumptionem juris de sua idoneitate sic, ut, si quis non idoneum assereret, non Clerico, de quo id asseritur, suæ idoneitatis probandæ onus incumbat; sed afferenti, in idoneitatem; uthabetur in c. fin. b. t. sed hoc non videtur procedere adeo indefinitè; quid enim operarentur ea verba: *si idoneus fuerit*, in rescripto ad Collatorem directo? Unde Vivianus in *praxi juris patron.* p. 12. l. 6. c. 10. num. 12. distinguit inter idoneitatem *intrinsecam*, quæ habetur à puritate animæ, morum integritate, & bonitate vitae; ac *extrinsecam*, quæ à scientia, & literatura; & primam præsumi, nec probandam à tali Clerico; secus alteram, quæ accidentalis est; sic etiam Barbosa *de potest. Episcopi*, p. 2. alleg. 10. n. 17. Hinc illa clausula, *si idoneus fuerit*, non habet rationem conditionis relate ad qualitates illas naturales, & intrinsecas; nam quoad has tacitè inest provisionalibus rescriptis; sed quoad extrinsecas, in quantum sciri debent, ne Collator promoveat inidoneum.

### §. Unicus.

*An, qui fugit judicium, præsumatur confiteri objecta?*

194. DE hac quæstione extat c. 4. b. t. ubi Bonifacius VIII. sic loquitur: nullus dubitat, quod dicta judicium nocens subterfugit, quemadmodum, ut absolvatur, qui est innocens, querit: confitetur enim de omnibus, quisquis se subterfugere judicium

dilationibus putat. Nam, quemadmodum innocens non subterfugit judicium, in quo se absolvendum sperat, ita, qui dilationibus judicium declinare cupit, ea, de quibus accusatur, confiteri videtur; qui enim aliquoties, indulto sibi temporis spatio, intra quod comparere, & se purgare debeat, non comparet, aut se absentat, censetur crimen confiteri; ita etiam legitur in c. *Decernimus 10. causa 3. q. 9.* textus hujus c. sic habet: decernimus vestram debere intra provinciam esse judicium, & congregari Synodus ante diem Calendarum Novembrium; ut, si ad se revoluerit, præsens, si confidit, ad objecta respondeat: *si verò adesse neglexerit, dilationem sententiae de absentia non lucretur.* Nam manifestum est, confiteri eum de crimine, qui indulto, & roties delegato judicie, purgandi se occasione non utitur. Nihil enim interest, utrum in præsenti examine, non omnia quæ dicta sunt, comprobentur; cum ipsa quoque pro confessione procurata totius constet absentia; ubi glossa, V. *Manifestum*, ait, hoc intelligi secundum præsumptionem.

**1955.** Sed advertendum, hanc præsumptionem esse juris tantum, nec, nisi aliis juvetur adminiculis, & argumentis, probare concludenter. Hujus ratio mihi ex eo probatur; quia nunquam licet ex aliquo facto, vel effectu *concludenter* arguere ad hanc determinatè causam, quando tale factum, vel effetus nasci potest ex pluribus, æquè valentibus illum inducere, ac illa, ad quam determinatè arguitur; sed, quòd quis fugiat judicium, vel clam discedat ex carcere, nasci potest, ex pluribus aliis causis, quam ex mala conscientia; puta ex potentia adversarii, cum certitudine ferè morali majoris partis Judicium colligatorum, affectu, spe, &c. metu oppressionis, longæ fatigationis in causæ protelatione, arresti, & aliorum malorum, quæ quandoque processus secum ferunt, præsertim, ubi justitiam promovent munera; idem est, de metu diuturni carceris, longi squaloris, torturæ, etiam ex falsis testibus, pro-

bationibus, instrumentis, &c. non igitur *concludenter* licet arguere determinatè, fugam fieri ex mala conscientia, consequenter ex hoc delictum, vel causam esse confessam.

Dico, esse confessam; quia per hoc 1956, non nego, posse fieri conjecturam, seu concipi verosimile judicium, quòd hoc titulo [nimirum conscientiæ mali] declinet, aut fugiat; sed elidibile per contrariam probationem, quæ hoc major esse debet, quòd plura tali declinationi, vel fugæ accedunt adminicula, vel argumenta, & indicia, fieri ex tali causa; qua in re opus est magnâ Judicis discretione, ac prudentiâ, ut regula in dict. c. *Nullus* tradita, in casu particulari ritè applicetur; non autem, ut multi Judices, ipsi parum eruditæ faciunt, ex brocardico indefinitè sumpto statim sine discretione procedant ad pronuntiandum; cum hæc juris axiomata plurimis quandoque fallentiis subjiciantur; id, quod sapienter notavit Gregorius XIV. in sua constitut. *Cum alias non nulli, à nobis relata ex professo lib. 3. tit. 49. de Immunit. Eccles.*

Hinc aliqui distinguunt, an quis fugiat ante factam inquisitionem, vel factam accusationem, an post? in primo casu censem, præsumi quidem fugam fieri propter conscientiam criminis, cum Rei & sceleris conscientiæ plenumque fugâ salutem querere soleant, ut tradit *Mascardus de probat. conclus. 819. à num. 1. Farinac. in praxi crimin. l. 1. q. 48. num. 1. & 27.* [nisi tamen apparetalia probabilis causa fugæ; tunc enim discessio in dubio potius in bonam partem saltem negativè, hoc est, non in malam, accipienda est] non tamen facit probationem etiam semiplenam, consequenter sufficientem, ut exinde *Judex* (seclusis aliis probatio-nibus) ad pronuntiandum procedat: in secundo autem casu docent, discessionem vel fugam non sufficere ad præsumendam determinatè conscientiam criminis, sed

sed potius factam ex metu diuturni processus, & eorum, quæ illum consequuntur, quæ difficile est subire innocentem, & justam fugæ causam præbent, præsertim, ubi Judices in expeditionibus ejusmodi causarum lenti sunt, Reo interim per menses, & annos, duris quandoque carceribus detento, cum innumeris molestiis, expensis, & lictorum, aliorumque vexationibus, atque duritie, raro regressu ad famam ejusmodi processibus vehementer labefactari solitam, tametsi innocens declaretur; ita Menochius *l. i. præsumpt. q. 8. num. 39.* Farinac. cit. numer. 27.

*1958.* Advertendum autem nos loqui de fuga, vel discessione, secundum quod haberi solet pro indicio conscientiae delicti; aliud enim est, quando ipsa fuga est delictum, ut, si miles, legitimè condicetus, fugiat à militia, vel ex conflictu, aut commissa in excubiis statione; nam in tali casu non probatur delictum ex fuga; sed potius probatâ fugâ, vel eâ notoriâ, probatum, aut notorium est ipsum delictum; de quo V. Julius Clarus in practic. §. fin. q. 21. n. 19. Hinc censem aliqui, Reum, in publico carcere justè detentum ob aliquid crimen, eo effracto fugientem, haberi pro confessio, & convicto, sic, ut deprehensus pœnâ ordinariâ puniri possit; sic gloss. in *L. In eos 13. V. puniendi, ff. decustod. Reor. arg. L. i. ff. de Effractoribus.*

*1959.* Verum, ut ad hoc dicamus, præmitendum cum communiori Doctorum sententia, Reum non solum antè, sed etiam post Judicis sententiam, fugere posse, etiam cum effractione carceris; & hoc non solum in causa capitali, aut alia gravem corporalem pœnam exigente, sed etiam in causa pecuniaria; ita Saloni, Sà, Navarrus, & Sanchez, quos citat, & sequitur Haunoldus *tom. 5. de jure, & just. tr. 2. num. 331.* nam lex contraria excederet humanam conditionem; nec obstat; quod inde damnum sequatur custodi Reorum; & carcerum effractio graviter inhibita sit;

*Tom. II.*

nam damnum illud solum per accidens sequitur, sicut occisio innocentis, quæ fit, cum Princeps Urbem sibi rebellem armis, ac tormentis [ubi etiam plures quandoque innocentes cadunt] directè querit cogere ad obedientiam; effractio autem in casu fugæ licet, cum sit tantum remotio impedimentorum, obstantium consecutioni finis Reo licet, tali casu illicita non est.

Verum est, extare leges graviter pœnales, quibus dicitur, qui effracto carcere evaserunt, sumendum supplicium, imò capite puniendos, si perfractis toribus, &c. ut habetur *L. i. ff. de Effractoribus & Expilatorib.* sed hæ leges propter gravitatem pœnæ vel sunt nimis graves, vel non in usu, ut censem Lugo, apud Haunold. *cit. num. 332.* vel sunt mere pœnales, quæ non cadunt directè in actum sub lege pœnam illi statuente positum inducendo obligationem conscientiae ad illum caverendum; sed solum ad subeundam pœnam in casu deprehensi violatoris, eamque in vindictam publicam, aliis in exemplum, causâ boni communis, ne impunita maneant delicta, & eorum inquisitio, ubi justè suscipitur; de quo V. dicta *l. i. tit. 2. de constitut.* ubi egimus delege pœnali; his positis:

*1960.* Resp. ad doctrinam a nonnullis traditam, tales carcerum effractores, & fugitivos, ubi deprehensi fuerint, non posse pœnâ ordinariâ puniri ex præsumpta confessione, tanquam Reos criminis, propter quod incarcerauti fuerant; nec exinde crimen plenè probari; cum alia valde probabilis causa fugiendi allegari possit, videlicet ad liberandum se a molestiis carceris, & periculis imminentibus. Hinc seclusis aliis indicis criminis, ad summum facit præsumptionem ejus, sed juris tantum, probatione contrariâ elidibilem; quamvis puniri possint pœnâ effractioni decretâ, propter culpam duntaxat ci-  
vilem, sed solum, in quantum talis effractio delictum  
est.